

დამტკიცებულია

შპს „ქორალის“ დირექტორის

2021 წლის 03 სექტემბრის **N1/ს-56** ბრძანებით



შპს „ქორალის“

მოსწავლეთა თვითმმართველობის

დებულება

მუხლი 1. ზოგადი დებულებები

- 1.1. მოსწავლეთა თვითმმართველობა არის „ზოგადი განათლების შესახებ“ საქართველოს კანონის შესაბამისად არჩეული ორგანო. იგი წარმოადგენს სკოლის სტრუქტურულ ერთეულს და უფლებამოსილებას ახორციელებს მომდევნო სასწავლო წელს მოსწავლეთა შესაბამისი თვითმმართველობის ახალი არჩევნების ჩატარებამდე;
- 1.2. მოსწავლეთა თვითმმართველობა დაკომპლექტებულია საბაზო და საშუალო საფეხურის მოსწავლეებისაგან, რომლებიც აირჩევიან შესაბამისი საფეხურების მოსწავლეთა მიერ.

მუხლი 2. მიზნები და ამოცანები

- 2.1. მოსწავლეთა თვითმმართველობის ძირითადი ამოცანაა ხელი შეუწყოს სკოლის ფუნქციონირებასა და მმართველობით საკითხებში მოსწავლეთა მაქსიმალურ ჩართულობას.
- 2.2. მოსწავლეთა თვითმმართველობა თავისი უფლებამოსილების ფარგლებში:
- ა) იცავს და წარმოადგენს მოსწავლეების უფლებებსა და კანონიერ ინტერესებს;
 - ბ) თანამშრომლობს სხვა საგანმანათლებლო, სასწავლო და სპორტულ/კულტურულ დაწესებულებებთან;
 - გ) მოსწავლეთა თვითმმართველობის მიზნების მისაღწევად ახორციელებს „ზოგადი განათლების შესახებ“ საქართველოს კანონით, სკოლის დებულებით და ამ დებულებით გათვალისწინებულ სხვა უფლებამოსილებებს.
- 2.3. მოსწავლეთა თვითმმართველობის ძირითად მიზნებს წარმოადგენს:
- მოსწავლეთა პრობლემური თუ საინტერესო საკითხების განხილვა და სკოლის მმართველობითი ორგანოების ინფორმირება.
 - სხვადასხვა საგანმანათლებლო აქტივობების ორგანიზება მოსწავლეთა პრაქტიკული უნარების განვითარებისათვის.
 - თავისუფალი პიროვნების ჩამოყალიბებისათვის საჭირო პირობების შექმნა.
 - მოზარდის გონებრივი და ფიზიკური უნარ-ჩვევების განვითარება; აუცილებელი ცოდნით უზრუნველყოფა; ცხოვრების ჯანსაღი წესის დამკვიდრება.
 - მოსწავლის მიერ ოჯახის, საზოგადოების, სახელმწიფოსა და გარემოს წინაშე საკუთარი უფლება-მოვალეობების გაცნობიერებაში ხელშეწყობა.

მუხლი 3. თვითმმართველობის დაფინანსების წყაროები:

მოსწავლეთა თვითმმართველობის დაფინანსების წყაროებია:

- ა) სკოლის ბიუჯეტი;
- ბ) მოსწავლეთა მიერ მოპოვებული გრანტები;
- გ) სხვა, კანონით ნებადართული შემოსავლები.

მუხლი 4. მოსწავლეთა თვითმმართველობის არჩევის წესი

- 3.1 საბაზო და საშუალო საფეხურის მოსწავლეები ირჩევენ საკუთარ თვითმმართველობებს.
- 3.2 თვითმმართველობის წევრები აირჩევიან თანასწორობის საფუძველზე, ფარული კენჭისყრით, კლასების მიხედვით თანაბარი წარმომადგენლობის პრინციპის დაცვით;
- 3.3 საბაზო და საშუალო საფეხურის მოსწავლეთა თვითმმართველობის არჩევნები ტარდება დირექტორის ბრძანებით განსაზღვრულ ვადაში(სასწავლო პროცესის დაწყებიდან არაუგვიანეს 2 თვის ვადაში);
- 3.4 მოსწავლეთა თვითმმართველობების არჩევნების ჩატარების თარიღს ნიშნავს დირექტორი;
- 3.5 საბაზო და საშუალო საფეხურების მოსწავლეთა თვითმმართველობებში თითოეული კლასის მოსწავლეები ირჩევენ თითო წარმომადგენელს, მომდევნო სასწავლო წელს მოსწავლეთა შესაბამისი თვითმმართველობის ახალი არჩევნების ჩატარებამდე;
- 3.6 საბაზო და საშუალო საფეხურის მოსწავლეთა თვითმმართველობების არჩევნებში მონაწილეობის მიღების უფლება აქვს, შესაბამისად, საბაზო და საშუალო საფეხურის ყველა მოსწავლეს;
- 3.7 საბაზო და საშუალო საფეხურების თითოეული კლასის მოსწავლე ხმას აძლევს ერთ კანდიდატს, შესაბამისად, საბაზო ან საშუალო საფეხურის მოსწავლეთა თვითმმართველობაში ასარჩევად. გამარჯვებულად ითვლება მოსწავლე, რომელიც შესაბამის კლასში მეტ ხმას მოიპოვებს;
- 3.8 მოსწავლეები, რომელთაც სურთ არჩეულნი იყვნენ საბაზო ან საშუალო საფეხურის თვითმმართველობაში, რეგისტრაციას გადიან შესაბამისი კლასის დამრიგებელთან არჩევნების ჩატარებამდე არა უგვიანეს 3 დღით ადრე.
- 3.9 მოსწავლეთა თვითმმართველობის წევრობის კანდიდატებს უფლება აქვთ აწარმოონ წინასაარჩევნო აგიტაცია და კამპანია.
- 3.10 ჩატარებული არჩევნები დასტურდება შესაბამისი ოქმებით;

მუხლი 5. მოსწავლეთა თვითმმართველობის პრეზიდენტის არჩევის წესი

- 5.1 მოსწავლეთა თვითმმართველობის პრეზიდენტი არის მოსწავლეთა თვითმმართველობის უმაღლესი თანამდებობის პირი, რომელიც თავმჯდომარეობს თვითმმართველობას და წარმოადგენს მესამე პირებთან ურთიერთობაში;
- 5.2 თვითმმართველობის წევრები არჩევნების დასრულებიდან 7 დღის ვადაში საკუთარი შემადგენლობიდან სიითი შემადგენლობის უმრავლესობით ირჩევენ თვითმმართველობის პრეზიდენტს, რომელიც ხელმძღვანელობს მოსწავლეთა თვითმმართველობას.
- 5.3 მოსწავლეთა თვითმმართველობის პრეზიდენტი აირჩევა მოსწავლეთა შესაბამისი თვითმმართველობის ახალი არჩევნების ჩატარებამდე;

მუხლი 6. მოსწავლეთა თვითმმართველობის პრეზიდენტის ფუნქციები
მოსწავლეთა თვითმმართველობის პრეზიდენტი:

- ა) ხელმძღვანელობს მოსწავლეთა თვითმმართველობას;
- ბ) წარმოადგენს მოსწავლეთა თვითმმართველობას სკოლის დირექციასთან და მესამე პირებთან ურთიერთობაში;
- გ) კოორდინაციას უწევს მოსწავლეთა თვითმმართველობის მიერ შექმნილი კლუბების საქმიანობას;
- დ) საჭიროების შემთხვევაში განსაზღვრავს მოსწავლეთა თვითმმართველობის მიერ შექმნილი კლუბების ხელმძღვანელებს;
- ე) კანონმდებლობით დადგენილი წესით ახორციელებს სხვა უფლებამოსილებებს

მუხლი 7. მოსწავლეთა თვითმმართველობის წევრისათვის უფლებამოსილების შეწყვეტის წესი

7.1. მოსწავლეთა თვითმმართველობის წევრისათვის უფლებამოსილების ვადამდე ადრე შეწყვეტის საფუძველია:

- ა) პირადი განცხადება;
- ბ) მოსწავლის სტატუსის შეჩერება/შეწყვეტა, სკოლიდან ამორიცხვა;
- გ) სკოლის შინაგანაწესის ან წინამდებარე დებულების წესების უხეში დარღვევა;
- დ) არასაკმარისი მიზნით 2 თვის მანძილზე მასზე დაკისრებული მოვალეობის შეუსრულებლობა;
- ე) სასამართლოს მიერ ქმედუვნაროდ, გარდაცვლილად ან უგზოუკვლოდ დაკარგულად გამოცხადება;
- ვ) გარდაცვალება;
- ზ) სხვა ობიექტური გარემოება.

7.2. საბაზო და საშუალო საფეხურების მოსწავლეთა თვითმმართველობის პრეზიდენტის უფლებამოსილების ვადამდე შეწყვეტის შემთხვევაში, მოსწავლეთა თვითმმართველობა შესაბამისი საფეხურის მოსწავლეთა თვითმმართველობის დარჩენილი წევრებიდან ირჩევს პრეზიდენტს დარჩენილი უფლებამოსილების ვადით.

მუხლი 8. თვითმმართველობის მუშაობის წესი

8.1 მოსწავლეთა თვითმმართველობას ხელმძღვანელობს თვითმმართველობის მიერ არჩეული პრეზიდენტი, ხოლო მისი არყოფნის შემთხვევაში სხდომას წარმართავს უხუცესი წევრი;

8.2 თვითმმართველობის პირველი სხდომა იმართება მოსწავლეთა თვითმმართველობის არჩევიდან 7 დღის ვადაში, ხოლო შემდგომ - მოსწავლეთა თვითმმართველობის პრეზიდენტის მოწვევით საჭიროების შემთხვევაში.

მუხლი 9. თვითმმართველობის ძირითადი ფუნქციები

9.1. თვითმმართველობა დასახული მიზნების მისაღწევად ახორციელებს შემდეგ ძირითად ფუნქციებს:

- თანამშრომლობს დირექციასთან და სხდომებზე მიღებულ გადაწყვეტილებებს ათანხმებს მასთან;
- იცვას მოსწავლეთა ინტერესებს და მათი უფლებებს, საჭიროების შემთხვევაში შუამდგომლობს მოსწავლეებს სკოლის დირექციასთან.
- ხელს უწყობს სკოლაში არსებული კლუბების აქტიურ მუშაობას.
- მონაწილეობას იღებს სკოლაში მიმდინარე ღონისძიებების, პროექტების დაგეგმვასა და განხორციელებაში;
- შუამდგომლობას აყენებს სკოლის დირექტორთან მოსწავლეების წახალისების საკითხთან დაკავშირებით;
- გეგმავს გამოფენებს სკოლის ტერიტორიაზე სკოლის დირექტორთან შეთანხმებით;
- შეიმუშავებს რეკომენდაციებს სკოლის შინაგანაწესთან დაკავშირებით;
- დირექტორს, აღმასრულებელ დირექტორს, დირექტორის მოადგილეებს სასწავლო და აღმზრდელობით დარგში წარუდგენს წინადადებებს სკოლისათვის მნიშვნელოვან ყველა საკითხთან დაკავშირებით;
- მონაწილეობს მოპოვებული გრანტის განკარგვაში;
- წევრთა ერთი მეხუთედის ინიციატივით ქმნის სასკოლო კლუბებს.

მუხლი 10. შემადგენლობა და უფლება-მოვალეობები

10.1 მოსწავლეთა თვითმმართველობა შედგება სკოლის საბაზო და საშუალო საფეხურების მოსწავლეებისაგან;

10.2 მოსწავლეთა თვითმმართველობას ხელმძღვანელობს პრეზიდენტი;

10.3 მოსწავლეთა თვითმმართველობა უფლებამოსილია, ამ დებულების შესაბამისად განსაზღვრული ფუნქციები განახორციელოს დამოუკიდებლად და ითანამშრომლოს სკოლის სხვა სტრუქტურულ ერთეულებთან;

10.4 მოსწავლეთა თვითმმართველობა ვალდებულია, თავისი საქმიანობა წარმართოს ამ დებულების საფუძველზე და მის შესაბამისად, წვლილი შეიტანოს მოსწავლეთა განვითარებაში.

მუხლი 11. დებულების დამტკიცება და ცვლილებების შეტანა

11.1 მოსწავლეთა თვითმმართველობის დებულებას ბრძანებით ამტკიცებს სკოლის დირექტორი.

11.2. დებულებაში ცვლილებებისა და დამატებების შეტანა ხდება ამ მუხლის პირველი პუნქტით დადგენილი წესის შესაბამისად.